

U ovom broju čitajte:

- **Udruženje poslodavaca FBiH upozorava da Vlada FBiH novčem privatnih kompanija finansira nerad uprava pojedinih javnih preduzeća**
- **Dobavljači iz RS-a podržavaju zaključke Pregovaračkog tima dobavljača Konzuma BiH pri UPFBiH**
- **Održana sjednica UO Grupacije poslodavaca SBK**
- **Ministarstvo trgovine i ekonomskih odnosa BiH podržalo inicijativu Udruženja za rješavanje neusklađenosti propisa koji tretiraju deklaracije proizvoda**
- **UPFBiH pozdravlja podršku predsjedavajućeg Vijeća ministara BiH pomjeranju roka naplate PDV-a**
- **Udruženje uputilo Zastupničkom domu PFBiH amandmane na Nacrt zakona o računovodstvu i reviziji**
- **Održana sjednica Upravnog odbora Grupacije poslodavaca iz oblasti finansija pri UPFBiH**
- **Priznanja za najuspješnije bh. kompanije: Elektroprivreda BiH prva po prihodu, Prevent najveći izvoznik**

Udruženje poslodavaca FBiH upozorava da Vlada FBiH novcem privatnih kompanija finansira nerad uprava pojedinih javnih preduzeća

Udruženje poslodavaca Federacije Bosne i Hercegovine upozorava na neravnopravan tretman javnih i privatnih preduzeća od strane institucija vlasti u BiH i FBiH, a na štetu privatnih kompanija i poslodavaca.



Godinama smo svjesni lošeg rukovođenja i upravljanja u dijelu preduzeća u državnom i većinski državnom vlasništvu, koje rezultira milionskim dugovanjima za poreze i doprinose, pri čemu nema adekvatnih sankcija za bivše i sadašnje članove menadžmenta i upravljačkih struktura u tim preduzećima. Ukoliko pak privatne kompanije kasne ili ne uplaćuju poreze i doprinose, to redovno vodi inspekcijskom nadzoru, plaćanju zateznih kamata na dugovanja, često stečaju i sudskom procesu protiv vlasnika/menadžera firme.

Nedavno je Vlada FBiH ponovila Javni poziv za kandidovanje programa utroška preostalih

sredstava utvrđenih u razdjelu 17. Budžeta FBiH za 2017. godinu u Federalnom ministarstvu energije, rudarstva i indstije „tekući transferi i drugi tekući rashodi – subvencije javnim preduzećima za uplatu doprinosa za PIO/MIO u svrhu penzionisanja zaposlenika“. Za ovu svrhu Vlada FBiH je u Budžetu za 2017. godinu izdvojila ukupno 1,5 miliona KM. Tako se novcem uzetim od poreznih obaveznika, najčešće privatnih kompanija iz realnog sektora, kupuje socijalni mir, plaća nerad i nemar menadžera i upravljačkih struktura u takvim preduzećima u kojima već odavno vlada nepisano pravilo imenovanja na rukovodeće pozicije „podobnih, a ne sposobnih“.

Također smo svjedoci da umjesto najavljenog „poboljšanja poslovnog ambijenta i snižavanja cijene rada“ na koje se Vlada FBiH obvezala Reformskom agendom, u protekle dvije i po godine kontinuirano predlaže zakone i donosi uredbe i odluke kojima se dodatno povećavaju troškovi proizvodnje, cijena rada i smanjuje konkurentnost privrede FBiH.

Još jednom podsjećamo da na spisku najvećih dužnika za poreze, doprinose, naknade i druge takse kojeg je objavila Porezna uprava

Federacije BiH krajem juna ove godine, među prvih deset kompanija koje budžetu FBiH duguju stotine miliona KM nema niti jedne privatne kompanije, a dug javnih kompanija po ovom osnovu je iz dana u dan sve veći.

Umjesto kupovine socijalnog mira (i glasova na

izborima) novcem poreznih obveznika, UPFBiH traži da se sistemski riješi pitanje dugovanja javnih preduzeća, omogući ravnopravan tretman državnih i privatnih preduzeća pri naplati poreza i doprinosa, provođenju kontrolnih mjera inspekcijskog i drugog nadzora, primjena Zakona o stečaju i slično.

Preporuka bh. dobavljačima da potpišu aneks ugovora o saradnji sa Mercatorom BH



Na sastanku Pregovaračkog tima dobavljača Konzuma kojeg je formiralo Udruženje poslodavaca Federacije Bosne i Hercegovine s predstavnicima Konzuma BiH i Poslovnog sistema Mercator održanog u Sarajevu 05. septembra 2017. godine upućen je poziv bh. dobavljačima da potpišu aneks ugovora o poslovnoj saradnji sa Mercatorom BH, te da nastava normalno poslovnu saradnju sa Konzumom BiH, a nakon što su ispunjeni

preduvjeti, odnosno, donesena odluka Privremenog vjerovničkog vijeća Agrokora o razdvajanju Konzuma BiH i Mercatora BH, te dokapitalizaciji Konzuma BiH.

Privremeno vjerovničko vijeće Agrokora donijelo je prošle sedmice u Zagrebu odluku o davanju saglasnosti izvanrednom povjereniku za dokapitalizaciju Konzuma BIH u iznosu od 68.7 miliona KM kroz društva Ledo Čitluk i Sarajevski kiseljak.

Vijeće je, također, podržalo odluku da Agrokor Konzumu BiH osigura svježu likvidnost u iznosu do 29,7 miliona KM.

Dobavljači iz RS-a podržavaju zaključke Pregovaračkog tima dobavljača Konzuma BiH pri UPFBiH

U Privrednoj komori Republike Srpske 29. augusta 2017. godine održan je sastanak privrednih društava/dobavljača Konzuma d.o.o. Sarajevo iz Republike Srpske na temu obavještenja o ponovnom početku obavljanja registrovane djelatnosti društva Mercator BH d.o.o. Sarajevo. Privredna komora je s tim u vezi poslala dopis direktoru Konzuma BiH Tomislavu Bagiću u kojem se ističe da dobavljači iz RS-a podržavaju zaključke Pregovaračkog tima dobavljača Konzuma BiH pri UPFBiH.

Dopis prenosimo u cijelosti.

PREDMET: Zaključci sa sastanka dobavljača Konzuma d.o.o. Sarajevo iz Republike Srpske

Poštovani gospodine Bagić,

U Privrednoj komori Republike Srpske, dana 29.08.2017. godine, održan je sastanak privrednih društava/dobavljača Konzuma d.o.o. Sarajevo iz Republike Srpske na temu obavještenja o ponovnom početku obavljanja registrovane djelatnosti društva Mercator BH d.o.o. Sarajevo, kao i s tim u vezi potpisivanja Aneksa Ugovora sa društвom Konzum d.o.o.

Sarajevo, kojim bi Mercator BH d.o.o. Sarajevo pristupilo predmetnom ugovoru pod istim komercijalnim uslovima.

Na sastanku su doneseni sljedeći Zaključci:

1. Dobavljači iz Republike Srpske podržavaju Zaključke koji su doneseni na sastanku Pregovaračkog tima dobavljača Konzuma pri Udruženju poslodavaca Federacije BiH koji je održan 23.08.2017. godine u Posušju

2. Dobavljači iz Republike Srpske pozvani su da ne pristupe pojedinačnom potpisivanju Aneksa Ugovora sa društвom Konzum d.o.o. Sarajevo dok im se ne predovi jasan plan poslovanja Konzum d.o.o. Sarajevo i Mercator BH d.o.o. Sarajevo, kao i plan izmirenja njihovih potraživanja

3. Dobavljači iz Republike Srpske traže hitan sastanak rukovodstvom Konzuma d.o.o. Sarajevo i Mercator Slovenija na kojem bi predstavili plan restrukturiranja Konzum d.o.o. Sarajevo i finansijski plan izmirenja obaveza prema dobavljačima u BiH

4. Dobavljači od rukovodstva Konzum d.o.o. Sarajevo traže da u roku od 7 dana dostave

Agrokor donio odluku o dokapitalizaciji Konzuma u BiH



U namjeri da snažno podrži proces transformacije i daljnje stabilizacije poslovanja Konzuma BiH, Privremeno vjerovničko vijeće Agrokora je 31. augusta 2017. godine u Zagrebu donijelo odluku o davanju saglasnosti vanrednom povjereniku za dokapitalizaciju Konzuma BIH u iznosu od 68.7 miliona KM kroz društva Ledo Čitluk i Sarajevski Kiseljak.

Kako se navodi u saopćenju, Vijeće je također podržalo odluku da Agrokor Konzumu BiH osigura svježu likvidnost u iznosu do 29,7 miliona KM. Ovim odlukama se obezbjeđuje budućnost Konzuma BiH, koja uključuje očuvanje više od 3,700 radnih mesta i plaćanje potraživanja dobavljača, na dobrobit ukupne privrede Bosne i Hercegovine. Agrokor u cijelosti podržava strategiju Konzuma BiH za stabiliziranje poslovanja i ovim je odlukama pokazao da je spreman dati punu podršku

daljem razvoju kompanije.

Odlukama održanog Privremenog vjerovničkog vijeća Agrokora otvoren je put od strane Agrokora i da Mercator poduzme korake potrebne kako bi se realizirao plan unutar kojeg Mercator tokom septembra vraća 83 sadašnje trgovine Konzuma BiH pod brend Mercator.



Razdvajanjem Konzuma BiH i Mercatora počinje nova strategija Konzuma BiH koja će još više biti prilagođena potrebama i navikama bosanskohercegovačkih potrošača, a sve u cilju postizanja što boljih poslovnih rezultata. Unutar svoje buduće poslovne strategije, u koju duboko vjeruje, Konzum BiH će se fokusirati na trgovine male i srednje veličine. Stvaranju budućih boljih poslovnih rezultata će znatno doprinijeti i prestanak daljih obaveza plaćanja zakupa za velike trgovine Mercatora

kao i obaveze održavanja istih.

Kompletan proces je vođen s posebnom pažnjom posvećenom očuvanju radnih mesta i socijalnom osjetljivošću, a zaštita interesa uposlenika kompanije Konzum BiH je bila prioritet. Daljnja strategija Konzuma BiH i povratak Mercatora na tržište BiH osigurava dodatnu stabilnost i očuvanje radnih mesta naših uposlenika.

Odluke Privremenog vjerovničkog vijeća Agrokora tako će obezbjediti daljnju stabilnost poslovanja. Ove odluke su na dobrobit uposlenika, dobavljača ali i brojnih kupaca koji zahvaljujući Konzumu BiH, a uskoro ponovo i Mercatoru, imaju najširi mogući izbor kupovine po najboljim cijenama, navodi se u saopćenju.

Šarović i Ramljak: Stabilizirano poslovanje Agrokora

U Sarajevu je 13.09.2017. održan četvrti sastanak o poslovanju Agrokora u BiH kojem je prisustvovao ministar vanjske trgovine i ekonomskih odnosa BiH Mirko Šarović, federalni ministar trgovine Zlatan Vujanović, ministar trgovine i turizma RS Predrag Gluhaković i povjerenik hrvatske vlade za Agrokor Ante Ramljak sa saradnicima.

Kompanije koncerna Agrokor u BiH zapošljavaju oko 5.000 radnika, a Velpro je u postupku likvidacije. Sada već bivši radnici zbrinuti su na različite načine.

Ministar Šarović je kazao da postoje postoje vidni napretci da je stanje u Agrokoru i njegovim kompanijama stabilno.

- Nas je najviše zanimalo pitanje uposlenih radnika i konsolidacija Leda i Sarajevskog kiseljaka da vidimo gdje su te kompanije u BiH u narednih nekoliko mjeseci - kazao je Šarović.

Ramljak je kazao da se može reći da su u BiH stabilizirali poslovanje.

- Krenuli smo u izvršenje plana da se Mercator vrati u BiH i preuzme svoje dućane i to znači da ćemo dokapitalizirati poslovanje sa svježim novcem koji ćemo staviti iz Agrokora i to znači smiriti situaciju sa dobavljačima koji će sigurno naplatiti svoja potraživanja. Naši zaposlenici neće i ne trebaju strahovati za svoja radna mesta - kazao je Ramljak.

Održana sjednica UO Grupacije poslodavaca SBK



U Travniku je 29. augusta 2017. godine održana sjednica Upravnog odbora Grupacije poslodavaca SBK/KBS kojoj je prisustvovao i direktor krovnog udruženja sa saradnicima.

Na sjednici je, između ostalog, razgovarano i o otvaranju kancelarije ove grupacije u Travniku. Napravljen je prijedlog kako organizacijski i kadrovski ustrojiti kancelariju, a direktor Udruženja poslodavaca FBiH Mladen Pandurević istakao je da će Udruženje finansijski pomoći u zasnivanju. Predloženo je da se uposli tehnički sekretar koji bi bio na usluzi članicama tog kantona, kao i krovnom

udruženju.

Nadalje, član UO Grupacije Senid Gerin iznio je nekoliko problema sa kojima se poslodavci sa tog kantona susreću, te će se dopisom zvanično obratiti Udruženju poslodavaca FBiH kako bi Udruženje dalje postupalo.



Direktor UPFBiH obavijestio je članove o statusu inicijativa Udruženja za promjenu aktuelnih zakonskih rješenja od značaja za privredu Federacije BiH. Potrebno je zajednički djelovati u formiranju zahtjeva i potaknuti političku volju za poboljšanje poslovnog ambijenta. Dogovoreno je da će se u narednom periodu održati sastanci sa predstavnicima poslodavaca kako bi se formulirale potrebe i problemi poslodavaca u Federaciji BiH.



Ministarstvo trgovine i ekonomskih odnosa BiH podržalo inicijativu Udruženja za rješavanje neusklađenosti propisa koji tretiraju deklaracije proizvoda

U prostorijama Udruženja poslodavaca FBiH 18. septembra 2017. godine održan je sastanak sa predstavnicima dm drogerie markt BiH i Ministarstva vanjske trgovine i ekonomskih odnosa BiH na temu neusklađenosti propisa koji tretiraju deklaracije proizvoda u dva bh. entiteta. Sastanku su ispred dm-a prisustvovale Admira Isaković i Selma Idrizović, pomoćnik ministra Dragan Milović, šef Odsjeka za nadoz nad tržištem Samir Sabljica, sekretar Udruženja Mersiha Jusić i pravnica Jasmina Kurspahić.



Sastanak je održan s ciljem da se zajednički nađe rješenje za probleme sa kojima se susreću poslodavci na teritoriju FBiH koji se bave prodajom kozmetičkih proizvoda zbog neusklađenosti entetskih zakona. Na sastanku su se analizirali sljedeći propisi: Zakon o zaštiti potrošača BiH, Zakon o zaštiti

potrošača u RS-u, Zakon o predmetima opšte upotrebe u RS-u i Pravilnik o bezbjednosti predmeta široke potrošnje u RS-u.



Naime, prema važećim zakonima u BiH, FBiH i RS poslodavci u Federaciji moraju na različite načine deklarisati proizvode. Način na koji se deklarišu proizvodi u većem bh. entitetu nije prihvaćen od strane inspekcijskih organa na području RS-a i obratno. Zbog toga se kompanije susreću sa velikim problemima i gubicima. Poslodavac koji posluje na cijelom prostoru Bosne i Hercegovine, za koje smatramo da je jedinstveno ekonomsko područje, mora poštovati različite propise, tako da ima obavezu da jedan proizvod posebno deklariše za RS, a posebno za FBiH. Nema mogućnost da ima jedinstvenu deklaraciju na osnovu koje će proizvod biti u upotrebi na cijeloj teritoriji BiH.

Zbog svega navedenog, kompanije trpe velike gubitke, jer su u obavezi da imaju posebna skladišta za robu na području RS-a, a posebna skladišta za robu na području Federacije. Neke od kompanija su vodile i sudske sporove zbog različitog tumačenja zakonskih propisa kojima se regulira ova materija, što iziskuje dodatne sudske troškove.

Predstavnici Ministarstva trgovine i ekonomskih odnosa BiH su podržali Udruženje poslodavaca FBiH u rješavanju ovog problema te je zaključeno da se mora što hitnije pronaći rješenje za navedeni problem.

Dogovoreno je da se organizira zajednički

sastanak sa predstavnicima kompanija koje se susreću sa ovim problemom, predstavnikom iz Ministarstva vanjske trgovine i ekonomskih odnosa BiH, glavnim federalnim tržišnim inspektorom i nadležnim federalnim ministarstvom za donošenje propisa koji reguliraju predmete opšte upotrebe u Federaciji.

Na ovaj način će se pronaći najbolji i najbrži pravci djelovanja kako bi privrednici u BiH imali uštede na troškovima prevođenja deklaracija, etiketiranja proizvoda i skladištenja, što bi u konačnici rezultiralo i na smanjenje nabavne cijene robe, odnosno potrošačkih cijena.

Panel diskusija—Plava knjiga

Udruženje poslodavaca FBiH će 27.09.2017. godine u hotelu Hollywood sa početkom u 11:00 časova organizovati Panel diskusiju na temu „Plava knjiga“.

Prezentaciju „Plave knjige“ održat će **Vjekoslav Domljan.**

Plava knjiga je produkt ekonomskog savjeta Vlade Federacije BiH, a svrha Plave knjige je pokazati kako staviti (F)BiH na putanju visokog rasta. Tek ostvarivanje rasta od preko 7%

prosječno godišnje na rok od preko 25 godina, osigurava (F)BiH mjesto među zemljama visokog dohotka.

Na Panel diskusiji naše članice će imati priliku direktno, kroz primjedbe i sugestije, učestvovati u kreiranju sadržaja i smjernica Plave knjige, a koja će služiti kao materijal za realizaciju programa rada i Reformske agende Vlade FBiH.

Zvizdić: Podrška zahtjevu privrednika da se PDV plaća posljednjeg dana u mjesecu



U vezi sa najavljenim izmjenama Zakona o PDV-u, čije se usvajanje na Upravnom odboru Uprave za indirektno oprezivanje BiH očekuje u narednom periodu, poslije čega će isti biti upućen na razmatranje u Vijeću ministara BiH, očekujem da će, uz prateće stručne stavove i analize, biti prihvaćen i ugrađen zahtjev velikog broja privrednika u BiH da se rok za plaćanje PDV-a pomjeri na posljednji dan u mjesecu, kao i da se smanji dnevna zatezna kamatna stopa, stoji u saopćenju predsjedavajućeg Vijeća ministara BiH Denisa Zvizdića.

- Ovakve zahtjeve udruženja privrednika i obrtničkih komora podržavam, isti su opravdani i sigurno će dovesti do poboljšanja poslovnog okruženja u BiH, jer će pomjeranje roka za plaćanje PDV unaprijediti likvidnost preduzeća, a smanjenje zatezne kamatne stope bitno smanjiti troškove i olakšati poslovanje. Istovremeno će se sa

pomjeranjem roka za plaćanje PDV-a na posljednji dan u mjesecu porezna legislativa uskladiti sa odredbom o roku izvršenja novčane obaveze između preduzetnika u novčanim transkacijama – poručio je Zvizdić.

Istiže da je uz "uz produžavanje roka za plaćanje PDV-a i smanjenja zateznih kamata, kao mjeru podrške razvoju poslovnog sektora, na način kako je to i predviđeno reformskom agendom, očekujem da Uprava za indirektno oporezivanje u najkraćem roku postupi u skladu sa definisanim smjernicama Vijeća ministara BiH, i stvari potrebne pretpostavke za uvođenje elektronskog plaćanja PDV-a i direktnih poreza, što će smanjiti opterećenje resursa i uštede vremena privrednicima u izvršenju svojih obaveza".

- Ako se ovome dodaju i izmjene, odnosno povećanje praga za ulazak u PDV sistem, usklađivanje sa legislativom EU-a, kao i spomenuto uvođenje e-sistema plaćanja, onda će izmjene Zakona o PDV-u imati stvaran i efikasan cilj, koji će značiti razumijevanje potreba privrednika, u smislu olakšanja njihovog poslovanja, dalnjeg razvoja i novih ulaganja, i u konačnici što je i najvažnije, novog zapošljavanja – kazao je Zvizdić.

Udruženje poslodavaca FBiH pozdravlja podršku predsjedavajućeg Vijeća ministara BiH pomjeranju roka naplate PDV-a

Udruženje poslodavaca FBiH već duži period zahtjeva izmjenu Zakona o porezu na dodatnu vrijednost kao i Pravilnika o primjeni Zakona o PDV-u, stoga pozdravlja podršku predsjedavajućeg Vijeća ministara BiH Denisa Zvizdića o pomjeranju roka naplate PDV-a.

Udruženje poslodavaca FBiH već je ranije ukazalo UIO na manjkavosti postojećih zakonskih rješenja, te i dalje insistira da se u novi zakon uvrste i druge odredbe koje bi olakšale poslovanje.

Naime, potrebna je izmjena Uputsva o postupku izvoza kojom bi se omogućilo podnošenje carinske prijave elektronskim putem. Na taj način a ne u pisanim obliku, kakvo je sada pravilo. Postojeće rješenje je prevaziđeno, ne dovodi do poboljšanja kvaliteta carinskih kontrola i nije u skladu sa carinskim propisima drugih zemalja i zemalja Europske unije.

Također, zbog primjene članova 94. i 95. Pravilnika o primjeni Zakona o PDV-u privrednici u BiH ne mogu ostvariti povrat PDV-a iz 11 zemalja EU, koje traže reciprocitet. BiH gubi oko 120 miliona

godišnje po ovom osnovu. UP FBiH predložilo je izmjenu ovih članova, a koja bi omogućili zaključivanje bilateralnih sporazuma o izbjegavanju dvostrukog oporezivanja.

Također, u postojećem Pravilniku o primjeni Zakona o PDV-u ne postoji odredba kojom se omogućava naplata PDV-a od stranih prevoznika u BiH. Time se vrši diskriminacija domaćih prevoznika koji plaćaju PDV, u odnosu na strane prevoznike, a BiH zbog toga ima gubitke od 15 do 30 miliona KM godišnje.

Nadalje, inicijativa Udruženja je i uvođenje plaćanja PDV-a po naplaćenim, umjesto po izdatim fakturama

Poslodavci također insistiraju na ukidanju fiskalizacije u veleprodaji, kao i na ukidanju uređaja za fiskalizaciju, uz obavezu poreznih obaveznika da se softverski povežu sa serverom Uprave za indirektno oporezivanje.

Iako je pohvalna podrška predsjedavajućeg Vijeća ministara BiH, očekujemo da će i ostali prijedlozi Udruženja poslodavaca FBiH biti usvojeni, a koji bi olakšali poslovanje i rezultirali jačanjem domaće privrede i otvaranjem novih radnih mesta.

Udruženje poslodavaca FBiH uputilo Zastupničkom domu PFBiH amandmane na Nacrt zakona o računovodstvu i reviziji



Udruženje poslodavaca FBiH uputilo je predstavnicima klubova političkih stranaka Zastupničkog doma Parlamenta Federacije BiH amandmane na Nacrt zakona o računovodstvu i reviziji, a s ciljem poboljšanja poslovnog ambijenta.

Amandmanima se nastoji poslodavcima smanjiti obaveze pri postupku revizije, te na taj način olakšati poslovanje.

Između ostalog, Udruženje amandmanima predlaže da se obavezna revizija odnosi na pravna lica koja na dan sastavljanja finansijskih izvještaja ispunjavaju najmanje dva od sljedećih uslova: a) prosječna vrijednost poslovne imovine 4.000.000,00 KM; b) ukupan godišnji prihod 8.000.000,00 KM.

Predloženim rješenjem omogućava se ravноправan položaj na tržištu srednjih preduzeća sa drugim takvim preduzećima u BiH, te preduzećima iz okruženja i zemalja EU, koji ne moraju da plaćaju troškove revizije.

Nadalje, Udruženje traži da se izbriše član Zakona po kojem se zahtjeva obavezno članstvo revizora u Revizorskoj komori FBiH. Predložena odredba omogućava monopolski položaj postojećih revizorskih društava i nije u skladu sa direktivama Europskog parlamenta i Vijeća Europe. Također, predlaže se da licenca nema vremenski period na koji se izdaje, a da se uvede oduzimanje licence te da će se način dobijanja i douzimanja licence utvrditi Pravilnikom nadležnog organa a u skladu sa Direktivom EU.

Amandmane Udruženja možete pogledati [OVDJE](#).

Održana sjednica Upravnog odbora Grupacije poslodavaca iz oblasti finansija pri UPFBiH

U prostorijama Udruženja banaka BiH 12. septembra 2017. godine, održana je sjednica Upravnog odbora Grupacije finansijskih poslodavaca FBiH.



Nakon usvajanja Zapisnika sa prošle sjednice UO, predsjednik pregovaračkog tima za Kolektivni ugovor za granu finansijskih poslodavaca Vencel Matijević upoznao je članove o statusu pomenutog ugovora. Naveo je da je sporna odredba definisanje visine najniže plaće, te da se pokušava pronaći rješenje koje bi bilo prihvatljivo i za Sindikat i za poslodavce.

Prijedlog je da član koji definiše najnižu plaću glasi:

Najniža pojedinačna/individualna plaća, za puno radno vrijeme, koja u sebi sadrži osnovnu plaću i dio plaće za radni učinak, za zaposlenike koji obavljaju srednje složene

poslove, uz povremenu pojavu novih poslova, složenijih i raznovrsnijih poslova koji zahtijevaju razumijevanje radnih uputa i konzultacije pri izvršavanju poslova, za koje je potrebna srednja školska spremna, ne može biti niža od 85% od prosječne plaće isplaćene u FBiH u prethodnoj godini.

Ostavljen je rok do kraja septembra da članovi Upravnog odbora Grupacije upoznaju svoja Udruženja sa ovim prijedlogom i zvanično potvrdi ili ne potvrdi isti.



Nadalje, Marin Ivanišević je predložio da se prilikom amandmanskog djelovanja na zakone koji su od interesa za ovu grupaciju isti proslijede članovima Upravnog odbora Grupacije i da amandmani o kojima se oni usaglase budu predstavljeni ispred Udruženja poslodavaca FBiH, te će se u drugoj polovini

oktobra održat tematska sjednica Upravnog odbora ove grupacije na kojoj će se razgovarati o ciljevima i načinima djelovanja ove grupacije. Predložit će se zakazivanje sastanka prije tematske sjednice na kojem će prisustvovati predsjednik UP FBiH Adnan Smailbegović, direktor UP FBiH Mladen Pandurević, predsjednik UO Grupacije Senad Redžić i član UO Ivan Luburić. Tema sastanka

je ista kao i tema pomenute sjednice.

Također, na sjednici je iznesena informacija da Izmira Tuka, zbog prestanka poslovanja Unicredit Leasinga, prestaje biti član Upravnog odbora, te će se uputiti zahtjev Udruženju društava za leasing u kojem će se zatražiti da predlože novog člana Upravnog Odbora Grupacije ispred Udruženja društava za leasing.

Priznanja za najuspješnije bh. kompanije: Elektroprivreda BiH prva po prihodu, Prevent najveći izvoznik



Na gala svečanosti upriličenoj 20. septembra 2017. godine, u Hotelu Hills u Sarajevu, Poslovne novine obilježile su 30. godišnjicu Izbora „100 najvećih u privredi BiH“ i 45 godina uspješnog poslovanja. Kompanijama sa najboljim poslovnim rezultatima ostvarenim u prošloj godini, u okviru gala večeri, dodijeljena su priznanja Poslovnih novina.

Ove godine Poslovne novine dodijelile su

rekordan broj priznanja u odnosu na ranije izbore „100 najvećih u privredi BiH“.

„Analitika, koju je za nas uradio naš specijalni partner LRC iz Sarajeva, pokazala je da je ukupan prihod 100 najvećih kompanija u 2016. godini, u odnosu na godinu ranije, porastao za 2,76%. Ukupna dobit porasla je za 1,67%, dok je izvoz porastao za 8,51%, a broj uposlenih za 4,97%. Ovi parametri su rasli i u 100 srednjih i 100 malih kompanija koje se nalaze na našim rang-listama“, izjavila je Alena Ahmetspahić – Foča, glavna i odgovorna urednica Poslovnih novina i menadžerice Projekta.

Priznanja su dodijeljena prvoplaširanim kompanijama sa rang-listi Poslovnih novina rangiranim prema ukupnom prihodu, neto

dobiti i izvozu ostvarenom u 2016. godini. Među velikim kompanijama prema prošlogodišnjem ukupnom prihodu, neto dobiti i izvozu najbolje rezultate ostvarile su, **JP ELEKTROPRIVREDA BiH d.d. Sarajevo**, za 997.870.238 KM prihoda, **BH TELECOM d.d. Sarajevo** za 83.588.626 KM dobiti i **PREDIT BH d.o.o. Visoko** za 320.529.230 KM izvoza.



Nagrađene srednje kompanije po ukupnom prihodu, neto dobiti i izvozu ostvarenom u 2016. godini su: **HEP-TRADE d.o.o. Mostar** (38.539.604 KM prihoda), **HETA d.o.o. Sarajevo** (29.692.572 KM dobiti), **HEP-TRADE d.o.o. Mostar** (34.619.387 KM izvoza).

Na rang listi malih kompanija po ukupnom prihodu, neto dobiti i izvozu ostvarenom u 2016. godini, prvo mjesto zauzele su: **VENERA d.o.o. Banja Luka – PJ Tuzla** (7.801.274 KM prihoda), **H&L GROUP d.o.o. Sarajevo**, (5.301.436 KM dobiti), **VEZA-NEKT d.o.o. Sarajevo** (4.847.383 KM izvoza).

Priznanje za najvećeg investitora u BiH u 2016. godini pripalo je **J.P. ELEKTROPRIVREDA d.d. Sarajevo** za 146.749.314 KM ostvarenih

investicija.

Specijalnim priznanjem „**Srebrni pečat**“ za ostvarene zavidne rezultate svih parametara poslovanja Poslovne novine, ove godine, nagradile su dvije kompanije, Tvornicu higijenskih proizvoda **Violeta d.o.o.** iz Gruda i maloprodajni trgovački lanac **Bingo d.o.o.** Tuzla.



DOBITNICI PRIZNANJA PO INDUSTRIJSKIM GRANAMA

- **FIS d.o.o. Vitez**, prvo mjesto na rang-listi industrijske grane Nespecijalizirana trgovina na veliko u 2016. godini;
- **Holdina d.o.o. Sarajevo**, prvo mjesto na rang-listi industrijske grane Trgovina na veliko krutim, tečnim i plinovitim gorivima i srodnim



proizvodima u 2016. godini;

- **Bingo d.o.o. Tuzla**, prvo mjesto na rang-listi industrijske grane Trgovina na veliko i na malo u 2016. godini;
- **JP Elektroprivreda BiH d.d. Sarajevo**, prvo mjesto na rang-listi industrijske grane Proizvodnja električne energije u 2016. godini;




- **HIFA – PETROL d.o.o. Sarajevo**, prvo mjesto na rang-listi industrijske grane Trgovina na malo motornim gorivima u specijaliziranim prodavnicama u 2016. godini;
- **TRANZITEXPORT d.o.o. Sarajevo**, prvo mjesto na rang-listi industrijske grane Cestovni prijevoz robe u 2016. godini;
- **PHOENIX d.o.o. Bijeljina**, prvo mjesto na rang-listi industrijske grane Trgovina na veliko farmaceutskim proizvodima u 2016. godini;
- **BH Telecom d.d. Sarajevo**, prvo mjesto na rang-listi industrijske grane Djelatnosti žičane telekomunikacije u 2016. godini;

- **DEC, Projektna kancelarija, Stanari-Doboj**, prvo mjesto na rang-listi industrijske grane Gradnja stambenih i nestambenih zgrada u 2016. godini;
- **Bimal d.d. Brčko**, prvo mjesto na rang-listi industrijske grane Proizvodnja prehrambenih proizvoda u BiH u 2016. godini;
- **Bajra d.o.o. Travnik**, prvo mjesto na rang-listi industrijske grane Mesna industrija u 2016. godini;
- **Standard Furniture Factory d.d. Ilijaš**, prvo mjesto na rang-listi industrijske grane Proizvodnja namještaja u 2016. godini;
- **NSOFT d.o.o. Mostar**, prvo mjesto na rang-listi industrijske grane Računarsko programiranje, savjetovanje i djelatnosti u vezi s njima u 2016. godini.

Zahvaljujući LRC-u i njihovo dobroj saradnji s bonitetnim agencijama iz regionala, u novom, redizajniranom izdanju publikacije „100 najvećih u BiH“, objavljene su, po prvi put, i rang-liste 500 najvećih iz Slovenije, Hrvatske,

Srbije, Makedonije i Crne Gore.

Partneri ovogodišnjeg Projekta bili su Vijeće stranih investitora, Privredna komora Federacije BiH, Privredna komora Republike Srpske. Sponzorski su Projekt podržale brojne kompanije i medijske kuće.



Do 3. novembra

SEPTEMBAR DONOSI POKLONE!

2 GODINE
UŽIVAJ U POVOLJNOSTIMA
KOJE SAM IZABEREŠ

1 KM PRISTUP USLUGAMA



FIKSNA TELEFONIJA

ZA POSTOJEĆE I NOVE KORISNIKE

- **100 minuta besplatnih** razgovora mjesечно
- **40%** popusta na cijenu mjesечne naknade
- **5 KM Ultra bonus** saobraćaja mjesечно ili
- povoljnije cijene uređaja iz ponude BH Telekoma



INTERNET

ZA POSTOJEĆE I NOVE KORISNIKE

- popusti na cijenu mjesечne naknade
- Ultra bonus
- povoljnije cijene uređaja



moja tv

ZA POSTOJEĆE KORISNIKE MOJA TV

- besplatno korištenje Moja TV usluge na dodatnom TV prijemniku
- 12 mjeseci besplatnog korištenja jednog od dva dodatna paketa
- kupovina uređaja iz ponude BH Telekoma po povoljnijim cijenama

ZA NOVE KORISNIKE MOJA TV

- popust na cijenu mjesечne naknade do 120 KM
- dva mjeseca 50% popusta na cijenu mjesечne naknade i 6 mjeseci besplatnog korištenja jednog od dva dodatna paketa
- dva mjeseca 50% popusta na cijenu mjesечne naknade i 12 mjeseci besplatnog korištenja Moja TV usluge na dodatnom TV prijemniku

Navedene povoljnosti vrijede za korisnike fizička lica, dok pravna lica u ovoj akciji ostvaruju pravo na akcijsku cijenu pristupa usluzi od 1 KM sa PDV.

Ostale uslove korištenja akcijske ponude *Septembar donosi poklone* potraži na www.bhtelecom.ba ili putem **besplatnih info telefona 1444 i 1322**.



UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba